



Datë: 06.11.2025
Numër Protokolli: 7214/2025

A.nr.1674/2025

Këshilli i Pavarur Mbikëqyrës për Shërbimin Civil të Kosovës – Kolegji për Shqyrtimin dhe Vendosjen e Ankesave, në përbërje nga: Ardita Haxhnikaj Demi, kryetare, Malsore Gashi Bajraktari dhe Eshref Shabani, anëtarë, me Kaltrina Avdullahi-Prenaj, si procesmbajtëse, ka shqyrtuar ankesën me numër A.nr.1674/2025, të datës 08.09.2025, të parashtruar nga ankuesi F.L, kundër organit të punësimit: Komisioni Qendror i Zgjedhjeve, në çështjen juridike “*Kërkesë nga marrëdhënia e punës*”, duke vepruar në pajtim me nenin 6, paragrafin 1, nën paragrafin 1.1 dhe nenin 18, paragrafin 1, nën paragrafin 1.4 të Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës, më datë 06.11.2025, mori këtë:

V E N D I M

I. Aprovohet si e bazuar ankesa A.nr.1674/2025, e datës 08.09.2025, e parashtruara nga ankuesi F.L, ashtu që, **detyrohet** Drejtori Ekzekutiv i Komisionit Qendror të Zgjedhjeve, që brenda afatit prej 15 ditësh nga dita e pranimit të këtij vendimi, të rishqyrtoj kërkesën e datës 31.07.2025 të parashtruar nga ankuesi F.L, dhe të nxjerr akt administrativ në pajtueshmëri me dispozitat ligjore në fuqi.

II. Këshilli i Pavarur Mbikëqyrës për Shërbimin Civil të Kosovës duhet të njoftohet me shkrim pas ndërmarrjes së veprimeve në pajtim me këtë vendim.

A r s y e t i m

Nëpunësi civil, F.L (në tekstin e mëtejme referuar: Ankuesi), më datë 08.09.2025, ka parashtruar ankesë në Këshillin e Pavarur Mbikëqyrës për Shërbimin Civil të Kosovës, kundër heshtjes administrative të organit të punësimit në raport me kërkesën e datës 31.07.2025.

Këshilli i Pavarur Mbikëqyrës për Shërbimin Civil të Kosovës (në tekstin e mëtejme referuar: Këshilli) bazuar në dispozitat e Rregullores Nr.02/2018 për Procedurën e Shqyrtimit dhe Vendosjes së Ankesave, më datë 18.09.2025, ka proceduar kërkesën për përgjigje në ankesë tek Komisioni Qendror i Zgjedhjeve, ndërsa, ky i fundit, më datë 23.09.2025, ka përcjell shkresat e lëndës lidhur me çështjen përkatëse ankimore.

Kolegji i Këshillit nga administrimi i shkresave të lëndës ka gjetur se ankuesi është i punësuar në Komisionin Qendror të Zgjedhjeve, dhe se i njëjti sipas Akt emërimit me numër Nr.06/2025 të datës 17.06.2025, është emëruar në pozitën e punës “*Udhëheqës i Divizionit për Administratë dhe Shërbime të Përbashkëta*” në Departamentin për Financa dhe Shërbime të Përbashkëta.

Tutje, sipas shkresave të lëndës rezulton se ankuesi më datë 31.07.2025 ka parashtruar kërkesë tek organi i punësimit, duke kërkuar transferimin e përhershëm në pozitë ekuivalente si Zyrtar i Lartë për Regjistrim dhe Certifikim të Subjekteve Politike, për të cilën kërkesë i është dhënë një sqarim me datë 04.08.2025, nga Drejtori Ekzekutiv i SKQZ-së, pa lëshim të aktit administrativ.

Ankuesi ka parashtruar ankesë në Këshillin e Pavarur Mbikëqyrës për Shërbimin Civil të Kosovës, për shkak të mos trajtimit të kërkesës së datës 31.07.2025 nga organi i punësimit. Kërkon nga Këshilli që të aprovoj ankesën si të bazuar dhe ta detyroj organin e punësimit, në këtë rast Komisionin Qendror të Zgjedhjeve që të shqyrtoj kërkesën e ankuesit të datës 31.07.2025.

Kolegji i Këshillit ndërlidhur me rregullat e veprimeve procedurale të një organi publik, ju referua dispozitave të Ligjit Nr.05/L-031 për Procedurën e Përgjithshme Administrative (*tutje referuar: LPPA*), përkatësisht nenit 10 paragrafi 2 ku përcaktohet se: *2. Organi publik zhvillon procedurën administrative sa me të shpejtë dhe me sa më pak shpenzime, për të dhe për palën, duke mos cenuar çfarë është e nevojshme për një rezultat të ligjshëm e të përshtatshëm të procedurës administrative, si dhe nenit 97 paragrafi 1 të këtij ligji, ku përcaktohet se: 1. Një procedurë administrative e nisur sipas kërkesës, përfundon me njoftimin e një akti administrativ apo lidhjen e një kontrate administrative, dhe si rrjedhojë në kuptim të këtyre dispozitave ligjore si dhe bazuar në shqyrtimin e provave materiale të çështjes, Kolegji i Këshillit konstatoi se organi përkatës i punësimit, në rrethanat e rastit konkret, nuk ka vepruar në pajtueshmëri me dispozitat përkatëse ligjore, në raport me kërkesën e datës 31.07.2025, të parashtruar nga ankuesi, ngase sipas bazës ligjore si me sipër, vullneti i organit publik në realizimin e autoritetit publik formësohet në procedurë administrative dhe manifestohet në formën e njërit prej veprimeve administrative, siç janë: akti administrativ; kontrata administrative apo akti real, dhe se në vlerësimin e Kolegjit, organi përkatës i punësimit, në kuadër të autorizimeve të përcaktuara me legjislacionin në fuqi, është dashur që të nxjerr akt administrativ në kuptim të vendosjes dhe të njoftoj palën për aktin e tillë, brenda një afati prej 45 ditësh sikurse përcaktohet me nenin 98 paragrafi 2 apo afatit të vazhduar sipas nenit 99 paragrafi 1 të LPPA-së.*

Kështu që, thënë si me sipër e duke u bazuar në nenin 18, paragrafin 1, nën paragrafin 1.4 të Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës, Kolegji i Këshillit vendosi të aprovoj si të bazuar ankesën e datës 31.07.2025, në kuptim të shkeljeve procedurale, dhe si rrjedhojë detyroj Drejtorin Ekzekutiv në Komisionin Qendror të Zgjedhjeve, që në respektim të dispozitave procedurale të shqyrtoj kërkesën e ankuesit të parashtruar me datë 31.07.2025, dhe të nxjerr akt administrativ në përputhshmëri me dispozitat ligjore në fuqi.

Këshillë Juridike: *Vendimi hyn në fuqi në ditën e nënshkrimit nga Kryetarja e Kolegjit. Pala e pakënaqur, e cila pretendon se vendimi i Këshillit nuk është i ligjshëm, mund të iniciojë konflikt administrativ në Gjykatën Themelore në Prishtinë/Departamenti për Çështje Administrative, brenda afatit prej tridhjetë (30) ditësh, nga dita në të cilën i është dorëzuar vendimi. Inicimi i konfliktit administrativ nuk e ndalon ekzekutimin e këtij vendimi.*

KËSHILLI I PAVARUR MBIKËQYRËS PËR SHËRBIMIN CIVIL TË KOSOVËS
Lënda me numër A.nr.1674/2025

Kaltrina Avdullahi-Prenaj

Procesmbajtëse

Ardita Haxhnikaj Demi

Kryetare e Kolegjit

Vendimi i dërgohet:

- Ankuesit, F.L;
- Udhëheqësit të Njesisë së Burimeve Njerëzore në KQZ; dhe
- Arkivit të KPMSHCK-së.